

# Pòrkchòp Tur Dia

Hopi hende na nos isla--hende hòmbèr en partikular--ta kana ku e pensamentu iresponsabel ku un partner pa bida largu ta laf. "No por kome pòrkchòp tur dia" ta nan lema. "Mas muhé, mas mihó!"

Di un banda, no por kulpa nan ku nan tin e idea aki. Nan simplemente ta reflehá e edukashon ku nan a haña na kas. Hopi mayor ta indoktriná yunan hòmbèr ku e filosofia diabólíko aki for di tempu ku nan ta chikitu. Nan kier sa ku e yu hòmbèr tin un problema sikológiko si e no ta kore kaya. Nan ta enkurash'é p'é bin kas, tènk, i sali pa chèk e mucha muhé aki, gosa ku esun ei, disfrutá di e otro aya...awor aki, pasobra ora e ta kasa e mester bira hende serio.

Ma hopi di e yònkumannan aki no ta despuesto pa kasa. Nan ke ta liber pa sigui buska un partner ideal ku por sasia tur nan deseonan erótiko. Manera blenchi, nan ta bula di un "flor" pa otro, disfrutando di nan tur. I méskos ku orkan ta laga destrukshon su tras, di e mésun forma, e menernan aki ta bira lomba pa e damanan ku nan a konkistá, lagando nan ku kurasonnan i bidanan kibrá

Despues di tempu algun di e hòmbèrnan aki por kasa. Ma nan a kustumbrá ku e sistema di bida inmoral i no ta despuesto di "bira hende serio." E pensamentu ku nan tin ta ku matrimonio ta un wega infantil. Kon asina?

Dos mucha, Maida ku Hosé, ta hunga tek. Ta Maida su turno di kore tras di Hosé. Nèt promé ku Maida ta tek'é, Hosé ta krusa dede i grita "dukla." Segun Hosé, maske Maida ta mishi kuné, e no ta keda ku tek pasobra e tin dukla. Maida ta rabia, pasobra e no tabata sa ku nan tabata hunga ku regla di dukla.

Tantu yònkuman ta kasa ku dukla. O si, e ta primintí di bandoná tur otro i keda fiel na su esposa bida largu. Ma e brùit no sa ku e hòmbèr ta kasa ku dukla. E no a chèk su man skondí tras di lomba. Poko tempu despues, argumentando ku "no por kome pòrkchòp tur dia," e ta sali pa buska un "kuminda ku mas sous."

Siendo kasá, at'é ta kombersá ku Linchi, ta papi'é, konvens'é ku e ta e muhé ku lo por yena tur su nesesidatnan. E ta bis'é ku e ta stim'é asina tantu. Linchi ta respondé ku e tambe ta stim'é. Esei ta nèt loke e tabata ke tende! Lichi, manera raton, a kome e keshi, i e trampa ta dal sera. Badam! E yònkuman asuto ta bin ku su argumentá diabólíko, "Proba ku bo ta stimámi."

Ma poko tempu despues, e mésun mener ta desapuntá. Linchi no a sasia tur su deseonan. Atrobe, pasobra "no por kome pòrkchòp tur dia," e ta buska pa gara Mintje ku su palabranan bunita. E ta konvens'é ku e ta e úniko muhé ku e ta deseá. E ta papi'é te ora ku Mintje tambe ta pega den su spindura. I manera araña e mener aki no ta pèrdè su oportunitat pa agregá Mintje na su lista di muhénan "konkistá." I asina ta sigui ku Maria, ku Lucia, ku Ramona, ku... Nan tur ta forma parti di su "harem" pasobra "no por kome pòrkchòp tur dia."

Ma e lema di "pòrkchòp tur dia" ta un lema kiboká i desastroso. Ta bèrdat ku pòrkchòp tur dia lo bira un kansansio. Pero no por igualá relashon seksual ku kuminda. Sèks ta muchu mas ku un nesesidat físiko. E hendenan di Korintio tambe tabatin e pensamentu ku sèks ta solamente un nesesidat físiko, méskos ku kuminda. Nan lema tabata: "Kuminda ta pa barika, i barika ta pa kuminda" (1 Korintionan 6:13). Den otro palabra, méskos ku barika ta pidi kuminda, kurpa ta pidi sèks.

Ma e mésun teksto ta kòrda nos ku, "Kurpa no ta pa fornikashon, ma pa Señor i Señor pa kurpa." Bo kurpa ta pertenesé na bo Kreador. E tin e derechi di eksigí apstenensia di **tur** relashon seksual fuera di matrimonio i kastigá tur akto inmoral.

"No por kome pòrkchòp tur dia" por ta un bon propaganda pa Kentucky Fried Chicken. Pero usá pa ku e sekso opuesto, e ta un bunita ekskusa pa un piká mahos! Dios nunca ta kambia di opinion. Hebreonan 13:4 ta na vigor ketu bai: "Fornikadónan i kibradónan di matrimonio Dios lo husga nan." I ora Dios ta husga, ningun hende por skonde tras di pòrkchòp!